



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

31. 3. 2025. – 4. 4. 2025.

ODJELJENJE ZA BANKARSTVO, SLUŽBA FRONT OFFICE



Sarajevo, 7. 4. 2025. godine

**SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA
31. 3. 2025. – 4. 4. 2025.**


Tabela 1: Prikaz kretanja prinosa na državne obveznice

Prinosi	Eurozona			SAD			Velika Britanija			Japan		
	28.3.25	-	4.4.25	28.3.25	-	4.4.25	28.3.25	-	4.4.25	28.3.25	-	4.4.25
2 godine	2,02	-	1,83	3,91	-	3,65	4,20	-	3,93	0,87	-	0,64
5 godina	2,32	-	2,13	3,98	-	3,71	4,30	-	4,02	1,15	-	0,85
10 godina	2,73	-	2,58	4,25	-	3,99	4,69	-	4,45	1,54	-	1,22

Tabela 2: Prikaz kretanja prinosa na njemačke Bubillove

Dospijeće	Prinosi		
	28.3.25	-	4.4.25
3 mjeseca	2.118	-	2.075
6 mjeseci	2.070	-	2.028
1 godina	1.992	-	1.908

Grafikon 1: Prikaz krivulja prinosa državnih obveznica



Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 4. 4. 2025. godine (pune linije) i 28. 3. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

EUROZONA

Prethodnu sedmicu su obilježile vijesti koje se odnose na uvođenje dodatnih tarifa od strane SAD-a, prema kojima su na uvoz proizvoda iz EU u SAD carine povećane na 20%. EU ne planira da odmah uzvrat recipročnim mjerama, već planira da procijeni situaciju prije nego odgovori. Predsjednica Evropske komisije Von der Leyen je osudila ovakav potez upozoravajući na strašne posljedice po ugrožene građane i više troškove za osnovne namirnice. Izrazila je spremnost za pregovore, ali i kontramjere. EU se priprema za pregovore sa SAD-om, u nadi da će uspjeti sačuvati transatlantski odnos i postojeći ekonomski poredak. Ministar finansija Francuske Lombard je izjavio da EU raspravlja o širokoj lepezi odgovora na američke tarife, koji bi mogli uključiti mjere kojima bi se naštetilo najvećim američkim tehnološkim kompanijama. Nakon ovih vijesti, berze su u četvrtak na globalnom nivou zabilježile priličan pad, dok su prinosi državnih obveznica također značajno smanjeni jer se očekuje da će centralne banke biti primorane da brže i više smanjuju kamatne stope. Dodatni pad indeksa dionica i prinosa državnih obveznica je uslijedio u petak kada je Kina najavila da će uvesti recipročne mjere na najavljene tarife iz SAD-a, te da će od 10. aprila carine na američke uvozne proizvode iznositi 34%. U odnosu na prethodnu sedmicu prinosi njemačkih obveznica su smanjeni za 15 do 19 baznih poena, prinosi francuskih obveznica za 10 do 16 baznih poena, a prinosi italijanskih obveznica za 8 do 13 baznih poena.

Očekivanja da će ECB smanjiti kamatne stope na sjednici koja se održava 17. aprila, povećana su na preko 85%, a očekuju se najmanje još dva smanjenja do kraja tekuće godine. Pored navedenih dešavanja, objavljeni podaci o nastavku pada inflacije u eurozoni ka ciljanom nivou od 2% također idu u prilog očekivanom smanjenju kamatnih

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

stopa. Zapisnik s posljednje održane sjednice ECB je pokazao da su članovi UV očekivali da će tarife SAD-a uticati na ekonomski rast, ali da su imali različite poglede u vezi s inflacijom, uz rizike, kako od toga da u srednjem roku inflacija može zabilježiti pad ispod ciljanog nivoa, tako i od toga da u srednjem roku može naglo da se poveća zbog kontramjera. Član UV ECB Nagel je izjavio da će povećanje tarifa zahtijevati reviziju monetarne politike ECB, a De Galhau je naglasio da bi sporija inflacija u eurozoni mogla „uskoro“ da podstakne još jedno smanjenje kamatnih stopa, umanjujući uticaj tarifa i naglašavajući da evropski dezinflatorni trend ostaje netaknut. S druge strane, član UV ECB Holzmann je ponovio da se protivi smanjenju kamatnih stopa na ovomjesečnoj sjednici, te izjavio da je ECB pretpostavila da će se inflacija smanjiti, a kako je inflacija sada neutralna i približava se cilju, ne postoji potreba da monetarna politika bude stimulativnija.

Tabela 3: Kretanje ekonomskih indikatora za eurozonu

Red. br.	Ekonomski indikator	Očekivanje	Stvarno	Prethodni
			stanje	period
1.	Stopa inflacije – EZ P	MAR	2,2%	2,3%
2.	Temeljna stopa inflacije – EZ P	MAR	2,5%	2,6%
3.	Proizvođačke cijene – EZ (G/G)	FEB	3,0%	1,7%
4.	PMI kompozitni indeks – EZ F	MAR	50,4	50,2
5.	Stopa inflacije – Njemačka P	MAR	2,4%	2,6%
6.	Stopa inflacije – Holandija P	MAR	3,3%	3,5%
7.	Stopa inflacije – Italija P	MAR	1,8%	1,7%
8.	Stopa inflacije – Irska P	MAR	-	1,4%
9.	Fabričke porudžbine – Njemačka (G/G)	FEB	1,5%	0,1%
10.	Industrijska proizvodnja – Španija (G/G)	FEB	-	-1,2%
11.	Industrijska proizvodnja – Francuska (G/G)	FEB	-1,3%	-1,2%
12.	Prerađivačka proizvodnja – Francuska (G/G)	FEB	-	-2,0%
13.	Maloprodaja – Njemačka (G/G)	FEB	0,5%	4,0%
14.	Maloprodaja – Holandija (G/G)	FEB	-	3,6%
15.	Maloprodaja – Italija (G/G)	FEB	-	0,9%
16.	Stopa nezaposlenosti – EZ	FEB	6,2%	6,2%
17.	Stopa nezaposlenosti – Italija	FEB	6,3%	6,2%
18.	Stopa nezaposlenosti – Belgija	FEB	-	5,8%
19.	Promjena broja nezaposlenih - Španija (u '000)	MAR	-	-6,0
20.	Stopa nezaposlenosti – Irska	MAR	-	3,9%

SAD

Fokus tržišnih učesnika protekle sedmice kako na globalnom nivou, tako i u SAD-u, bio je na agresivnoj trgovinskoj politici predsjednika Trumpa, nakon što su sredinom iste stupile na snagu najavljene carine. Zabrinutost investitora za efekte carina na globalnu ekonomiju, te strah od recesije su bili ključni faktori koji su uticali na finansijsko tržište u SAD-u. Posmatrano na sedmičnom nivou, prinosi američkih državnih obveznica, kao i indeksi dionica su zabilježili izraženo smanjenje.

Predsjednik SAD-a Trump je najavio drastične tarife trgovinskim partnerima SAD-a, uvodeći minimalnu tarifu od 10% na sav uvoz i viši porez zemljama sa značajnim trgovinskim neravnotežama, uključujući Kinu (54%), EU i Vijetnam. Tarife imaju za cilj smanjenje trgovinskog deficita od 918 milijardi USD i oživljavanje proizvodnje u SAD-u, pri čemu nose rizik od globalnog trgovinskog rata. Trump je proglasio vanredno stanje kako bi uveo tarife, navodeći da su trgovinske prakse nepravedne. Trump je istakao da su tarife korisne za radnike iz SAD-a, pozivajući strane zemlje da smanje trgovinske barijere i zaustave manipulaciju valute. Ekonomisti upozoravaju na više troškove potrošača i moguće poremećaje globalnih lanaca snabdijevanja iako Trumpov tim tvrdi da će tarife podstaći domaću proizvodnju i zapošljavanje. Tarife bi mogle dodatno zategnuti odnose između SAD-a i Kine, jer su fabrike već premjestile proizvodnju u druge azijske zemlje koje su sada također na meti. Dok Trumpova administracija obećava dugoročne benefite ekonomiji, javno nezadovoljstvo inflacijom i ekonomskim upravljanjem predstavlja značajan politički izazov.

Odricanje od odgovornosti (Disclaimer)


Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

Predsjednik FED-a iz Chicaga Goolsbee je upozorio na to da bi neizvjesnosti povezane s tarifama mogle naštetiti ekonomiji SAD-a ukoliko to uspori potrošnju ili poslovne investicije. Dodao je da je, uprkos snažnom ekonomskom rastu, što se reflektuje kroz objavljene podatke, raspoloženje među kompanijama i potrošačima naglo smanjeno. Predsjednik FED-a iz Richmonda Barkin je upozorio da bi tarife mogle predstavljati značajan izazov za centralnu banku tako što bi mogle da utiču na rast inflacije, ali i nezaposlenosti. Više cijene bi mogle oslabiti potražnju, smanjujući prodaje i podstičući kompanije na smanjenje troškova, uključujući smanjenje radnih mjesta. Prema trenutnim tržišnim očekivanjima, FED bi mogao u ovoj godini smanjiti referentnu kamatnu stopu četiri do pet puta, pod uticajem rasta zabrinutosti zbog agresivne trgovinske politike i njenih efekata na globalnu ekonomiju, te potencijalne recesije.

Tabela 4: Kretanje ekonomskih indikatora za SAD

Red. br.	Ekonomski indikatori		Očekivanje	Stvarno stanje	Prethodni period
1.	Stopa nezaposlenosti	MAR	4,1%	4,2%	4,1%
2.	Promjena zaposlenih nefarmerski sektor	MAR	140.000	228.000	117.000
3.	Promjena zaposlenih privatni sektor	MAR	135.000	209.000	116.000
4.	Promjena zaposlenih prerađivački sektor	MAR	0	1.000	8.000
5.	Inicijalni zahtjevi nezaposlenih za pomoć	29. mar	225.000	219.000	225.000
6.	Kontinuirani zahtjevi nezaposlenih za pomoć	22. mar	1.870.000	1.903.000	1.847.000
7.	ADP indeks promjene broja zaposlenih	MAR	120.000	155.000	84.000
8.	PMI indeks prerađivačkog sektora F	MAR	49,9	50,2	52,7
9.	Potrošnja građevinskog sektora (M/M)	FEB	0,3%	0,7%	-0,5%
10.	ISM indeks prerađivačkog sektora	MAR	49,5	49,0	50,3
11.	Broj zahtjeva za hipotekarne kredite	28. mar	-	-1,6%	-2,0%
12.	Fabričke porudžbine	FEB	0,5%	0,6%	1,8%
13.	ISM indeks uslužnog sektora	MAR	52,9	50,8	53,5
14.	Trgovinski bilans (u mlrd USD)	FEB	-123,5	-122,7	-130,7

Grafikon 2: Kretanje kursa EURUSD tokom protekle sedmice



USD je deprecirao u odnosu na EUR, te je kurs EURUSD zabilježio rast s nivoa od 1,0828 na nivo od 1,0956.

VELIKA BRITANIJA

SAD su uvele recipročne tarife od 10% na sav uvoz iz Velike Britanije. Bez obzira na napore da se osigura izuzeće od tarifa, tarife na čelik, aluminij i automobile su zadržane.

Ministrica Reeves je istakla da podržava slobodnu trgovinu, kao i to da Velika Britanija i SAD imaju izbalansirane trgovinske veze. Dodala je da se zalaže za smanjivanje, a ne za povećanje trgovinskih barijera, te navela da će Vlada izbjegavati proces uvođenja recipročnih tarifa prema SAD-u i da će posmatrati kako druge zemlje odgovaraju na tarife. Međutim, Velika Britanija je u četvrtak objavila indikativni spisak roba, koji pokriva 27% uvoza SAD-a iz Velike Britanije (prema podacima iz 2024. godine), radi odlučivanja o potencijalnim „osvetničkim” tarifama prema SAD-u. Iako se Britanija suzdržala od uvođenja recipročnih tarifa odmah, britanski sekretar za trgovinu, Reynolds, naglasio je da su u toku pregovori sa zvaničnicima SAD-a, koji imaju za cilj postizanje povoljnog trgovinskog dogovora, te upozorio na to da Velika Britanija zadržava pravo da uvede recipročne mjere ukoliko pregovori budu neuspješni. CBI (Confederation of British Industry) i drugi upozoravaju na to da eskalacija trgovinskog rata može izazvati značajne ekonomske posljedice, a Reeves je isključila ponovno povećanje poreza kakvo je uvela u budžetu objavljenom u oktobru 2024. godine.

Inflacija cijena hrane u Velikoj Britaniji je u martu porasla na najviši nivo u posljednjih 9 mjeseci. Laburisti se suočavaju s kritikama zbog rasta troškova života, a 80% Britanaca smatra da je rast cijena brži od rasta prihoda bez obzira na rast realnih plata. BRC (British Retail Consortium) upozorava na to da bi inflacija mogla porasti jer će se maloprodavci suočavati sa višim platama i porezima u aprilu, a diskonti, kao što su Aldi i Lidl, zabilježili su povećanje tržišne vrijednosti.

Članica MPC BoE Megan Greene je naglasila da, zbog upornih cjenovnih pritisaka i slabe ponude, postoji potreba za nastavkom smanjenja potražnje putem kamatnih stopa radi kontrole inflacije. Greene je navela da je usporavanje rasta plata previše sporo, te da bi povećana osjetljivost Britanaca na inflaciju mogla biti ukorijenjena čak i minimalnim povećanjima cijena. MPC oprezno upravlja kamatnim stopama u trenutnim uslovima domaćih i globalnih nesigurnosti, uključujući rast troškova zapošljavanja i trgovinskih tenzija. Iako je dezinflacija u toku, pokazatelji upornosti inflacije su jači od očekivanja, što komplikuje napore BoE za dostizanje cilja inflacije od 2%. Tržišta sada očekuju da bi do kraja godine BoE mogla tri puta smanjiti referentnu kamatnu stopu za po 25 baznih poena (trenutno je na nivou od 4,5%). Troškovi inputa su rasli najsporijim tempom u ovoj godini, a otpuštanja su nastavljena, iako sporijim tempom. Poslovni sektor Velike Britanije je povećao očekivanu stopu inflacije u narednih godinu dana na 3,4% u martu, što je najviši nivo u ovoj godini. Megan Greene iz BoE je izjavila da ovaj rast inflacije jeste evidentan, ali da još uvijek nije alarmantan.

Tabela 5: Kretanje ekonomskih indikatora za UK

Red. br.	Ekonomski indikatori		Očekivanje	Stvarno stanje	Prethodni period
1.	Neto potrošački krediti (u mlrd GBP)	FEB	1,2	1,4	1,7
2.	Potrošački krediti (G/G)	FEB	-	6,4%	6,4%
3.	Odobreni hipotekarni krediti (u hiljadama GBP)	FEB	65,6	65,5	66,0
4.	Monetarna baza M4 (G/G)	FEB	-	3,8%	4,1%
5.	BRC indeks cijena (G/G)	MAR	-0,4%	-0,4%	-0,7%
6.	PMI indeks prerađivačkog sektora F	MAR	44,6	44,9	46,9
7.	PMI indeks uslužnog sektora F	MAR	53,2	52,5	51,0
8.	PMI kompozitni indeks F	MAR	52,0	51,5	50,5
9.	Promjena zvaničnih rezervi (u mln USD)	MAR	-	4.390	646

Tokom protekle sedmice GBP je deprecirala u odnosu na EUR, pa je kurs EURGBP zabilježio rast s nivoa od 0,83671 na nivo od 0,85016. GBP je deprecirala u odnosu na USD, pa je kurs GBPUSD smanjen s nivoa od 1,2940 na nivo od 1,2887.

JAPAN

Premijer Japana Ishiba je najavio mjere podrške preduzetnicima usljed zabrinutosti zbog uvedenih tarifa, posebno na uvoz automobila, koje bi mogle izazvati ekonomsku krizu. Vlada planira da uspostavi 1.000 savjetodavnih punktova kako bi pomogla malim preduzećima i ponudila im finansijsku podršku. Tarife od 25% na automobile, koje su stupile na snagu, prijete automobilskoj industriji, koja izvozi milione automobila u SAD i zavisi od velikih lanaca snabdijevanja. Govoreći prije nego što je Trump najavio recipročne tarife, Ueda je istakao potrebu za pregovorima s članicama G20 u vezi s mogućim posljedicama od uticaja tarifa. Globalna aktivnost proizvodnje u martu je smanjena u iščekivanju tarifa, te će i to biti ključna tema za predstojeći sastanak MMF-a i članica G20.

Bivši član MPC BoJ Adachi je izjavio da bi moglo doći do povećanja referentne kamatne stope na sastanku BoJ, koji će se održati 1. maja, ako tarife SAD-a ne naruše globalno tržište. Adachi očekuje povećanje referentne kamatne stope do jula, ali je napomenuo da će BoJ pratiti uticaj tarifa SAD-a na poslovne investicije i plate.

Lična potrošnja, kao ključni faktor rasta BDP-a, i dalje je u fokusu guvernera BoJ Uede, jer inflacija premašuje cilj BoJ već skoro tri godine. Također, Liberalno-demokratska stranka okupila je radnu grupu kako bi se bavila Trumpovim nametnutim tarifama, uključujući recipročnu tarifu od 24% i dodatnih 25% na uvezene automobile. Predstavnici Asocijacije proizvođača automobila iz Japana i Asocijacije industrije automobilskih dijelova naglasili su uticaj tarifa, što je pomoglo u razvoju mjera za podršku. Šef istraživačkog vijeća Onodera Itsunori je istakao značaj zaštite industrije, radnih mjesta i života, te je najavio planove posjete automobilskim kompanijama.

Premijer Ishiba označio je uvođenje Trumpovih tarifa od 24% Japanu kao „nacionalnu krizu“, s padom prinosa na obveznice koji je bio jedan od najvećih u posljednjim decenijama, a akcije u Tokiju su u posljednjih 5 dana pretrpjele

najgori pad od pandemije COVID-19. Ishiba je najavio da Vlada istražuje kontramjere, uključujući osvetničke carine ili akcije putem Svjetske trgovinske organizacije (WTO).

Tabela 6: Kretanje ekonomskih indikatora za Japan

Red. br.	Ekonomski indikator	Očekivanje	Stvarno	Prethodni	
			stanje	period	
1.	Industrijska proizvodnja (G/G) P	FEB	1,2%	0,3%	2,2%
2.	Maloprodaja (G/G)	FEB	2,5%	1,4%	4,4%
3.	Broj započetih kuća (G/G)	FEB	-2,2%	2,4%	-4,6%
4.	Stopa nezaposlenosti	FEB	2,5%	2,4%	2,5%
5.	Odnos broja slobodnih radnih mjesta i broja prijavljenih radnika	FEB	1,26	1,24	1,26
6.	PMI indeks prerađivačkog sektora F	MAR	-	48,4	49,0
7.	Novčana baza (G/G)	MAR	-	-3,1%	-1,8%
8.	PMI kompozitni indeks F	MAR	-	48,9	52,0
9.	PMI indeks uslužnog sektora F	MAR	-	50,0	53,7
10.	Potrošnja domaćinstva (G/G)	FEB	-0,8%	-0,5%	0,8%

JPY je tokom protekle sedmice aprecirao u odnosu na EUR, te je kurs EURJPY zabilježio smanjenje s nivoa od 162,25 na nivo od 160,91. JPY je aprecirao i u odnosu na USD, te je kurs USDJPY zabilježio smanjenje s nivoa 149,84 na nivo od 146,93.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 69,36 USD (64,06 EUR).

Do sredine sedmice cijena nafte je uglavnom bilježila rast, nakon čega je, pod uticajem rasta zabrinutosti zbog potencijalne globalne recesije i agresivne trgovinske politike predsjednika Trumpa, bilježila izraženo smanjenje. U ponedjeljak je cijena nafte povećana za preko 3% dnevno nakon što je predsjednik Trump najavio moguće uvođenje sekundarnih tarifa na izvoz ruske nafte. Bilo kakva akcija usmjerena protiv Rusije mogla bi značajno uticati na tržište sirove nafte, a naročito na ključne kupce kao što su Indija i Kina. Prema procjenama tržišta, OPEC je smanjio proizvodnju nafte za 110.000 barela dnevno u martu, čime je output smanjen na 27,43 miliona barela dnevno. Uprkos rastu zaliha, cijena nafte je sredinom sedmice zabilježila rast. Prema EIA, zalihe sirove nafte u SAD su porasle za 6,2 miliona barela, na 439,8 miliona barela u sedmici zaključno sa 28. martom, što je u suprotnosti sa očekivanim smanjenjem od 700.000 barela. U četvrtak je cijena nafte smanjena za oko 6,5%, nakon Trumpovog uvođenja tarifa i odluke OPEC+ da utrostruči povećanje outputa planirano za maj. Ova dešavanja su izazvala najoštriji pad cijene od 2022. godine. Tarife su povećale strah od globalnog usporavanja ekonomskog rasta, a povećavanje outputa OPEC+, koje je imalo za cilj kažnjavanje članica koje ne poštuju pravila grupacije, povećalo je daljnji pritisak na cijene. Iako bi niže cijene nafte mogle smanjiti inflaciju za centralne banke, one signaliziraju zabrinutost zbog usporavanja ekonomskog rasta. Rast zaliha sirove nafte u SAD i slabiji osnovni ekonomski pokazatelji povećavaju pritisak, a analitičari upozoravaju na volatilnost cijena. Snažan pad cijene nastavljen je i na kraju sedmice (-7,4%), kada je Kina najavila uvođenje recipročnih mjera nakon uvođenja carina od strane SAD. Ključne zemlje OPEC+ ponovile su potrebu da se članice pridržavaju kvota za proizvodnju nafte, pozivajući zemlje koje ne ispunjavaju zahtjeve da podnesu planove kompenzacije do 15. aprila.

Na zatvaranju tržišta u petak cijena jednog barela sirove nafte je iznosila 61,99 USD (56,58 EUR), što predstavlja pad od 10,63% na sedmičnom nivou.

Grafikon 3: Kretanje cijene nafte tokom protekle sedmice




Na otvaranju londonske berze metala u ponedjeljak cijena jedne fine unce zlata je iznosila 3.085,12 USD (2.849,21 EUR).

Cijena zlata je tokom protekle sedmice bilježila volatilna kretanja usljed globalnih tržišnih turbulencija. Na početku sedmice je cijena ovog plemenitog metala zabilježila rast uzrokovan zabrinutošću zbog trgovinskog rata koji bi mogli izazvati Trumpovi planovi u vezi s globalnim tarifama. Investitori su u zlatu tražili osiguranje od predstojećih tarifa predsjednika SAD-a Trumpa i od geopolitičkih nesigurnosti i zabrinutosti zbog moguće recesije. Nakon što je u utorak blago korigovana naniže, cijena zlata je u srijedu zabilježila novi rekordno visok nivo. Rast je uslijedio nakon stupanja na snagu najavljenih tarifa na uvoz u SAD. Već u četvrtak je opet uslijedila korekcija cijene ovog plemenitog metala naniže. Arbitražna trgovina koja je donijela ogromne količine zlata i srebra u SAD zaustavljena je nakon što je Trump izuzeo plemenite metale od tarifa. Premije u SAD za zlato i srebro su pale. Američke zalihe su porasle na rekordne nivoe i to zalihe zlata za 26,5 miliona unci, a zalihe srebra za 174,6 miliona unci. Vrijednost ovih zaliha je procijenjena na oko 80 milijardi USD. Centralna banka Kazahstana, koja je bila značajan prodavac zlata, zaustavila je prodaju usljed neizvjesnosti zbog Trumpovog uvođenja tarifa. Banka namjerava da održi zlato na nivou od 50%-55% rezervi i da možda obnovi prodaju kada se nestabilnosti smire i cijene stabilizuju. S druge strane, Centralna banka Kine je saopštila da je u martu, peti mjesec zaredom, nastavila s kupovinama ovog plemenitog metala.

Na zatvaranju tržišta u petak cijena jedne fine unce zlata je iznosila 3.038,24 USD (2.773.13 EUR), što predstavlja pad od 1,52% na sedmičnom nivou.

Grafikon 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.